



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 3



US aser Iran külemi Strait of Hormuz azioktsü Trump-i jembi



PM Modi-i Rajya Sabha nung Middle East tebilemtsü lemsatep

VOL. XXIII ISSUE NO. 161 (ADOK 161) DIMAPUR RASEMNÜ (WEDNESDAY) METSÜREMI (MARCH) 25, 2026 ₹ 5.00

Dimapur nung LPG atema committee ka tentetogo

Dimapur, March 24, 2026 (TYO): Dimapur nung LPG aser tanga petroleum products alemba nung tenük yoktsü aser ano bendena ayuba, black market nung ayokba mesüra jenjang atuba azioktsü atema district-level committee ka tentetogo.

State sorkari tesüiba nung sangdong balala aser tetuyuba agütsüba tera yanglushir district sasep nung committee ka tenteter ta Dimapur Deputy Commissioner Dr. Tinojongshi Chang-i metetdaksü.

Iba committee yagi inyakim lateta aliba inyakdaksütsü aser supply o distribution system nung tim masüba noktangtsü ta pai ashi.

Iba committee nung tayongerji Additional Deputy Commissioner asütsü aser Deputy Commissioner of Police, District Civil Supplies Officer, Assistant Controller of Legal Metrology, Extra Assistant Commissioner (Sadar), State Level Coordinator of IOCL, IOCL Dimapur Senior Depot Manager aser BPCL Field Officer züngsemtem asütsü.

Iba committee aser enforcement team-i inspections senzütsü aser ozüng alema bendenba, black marketing aser LPG jenjang atuba noktangtsü.

LPG aser tanga petroleum products dak sendakba inyakim lateta aliba anema inyakertem Essential Commodities Act, 1955, LPG (Regulation of Supply and Distribution) Order, aser tanga ozüng ozüngtem kübok temerenshi alitsü.

Dimapur Deputy Commissioner-isa tanga sangdong ka nung Food and Civil Supplies Department den asüngdangteper commercial LPG cylinders atema osang ka metetdaksüo

Hospitals, educational institutions, hotels, restaurants, bakeries, dairies, aser transport dak sendakba rejutem amala essential sectors nem priority allocation agütsütsü aser DC office ajanga distribution asütsü ta DC office-i metetdaksü.

LPG bendena ayuba noktangtsü aser distribution shitak asütsü atema Oil Marketing Companies (OMCs)-i consumer shia indang tesüiba ita asem average consumption record süa aliba ama supply agütsütsü.

DC office-isa distributor tem dang date-wise records ayutsü tetuyuba agütsüo.

Parnokisa DC office nem daily distribution reports agütsütsü metetdaksüo.

Jelia putetba aser shitak anepaluba ajanga TB samatsü

Kohima, March 24, 2026 (TYO): Tuberculosis (TB) samatsü atema tashidak putetba aser quality treatment kanga tongtipang ta National Health Mission (NHM) Nagaland Mission Director Dr. Keveduyi Theyo-i ashi.

Mongulbarnü State College of Teacher Education nung World Tuberculosis Day 2026 amundang Dr. Theyo-i iba osang lemsatep.

National TB Elimination programme (NTEP) ajanga facilities ulushiogo aser health block shia nung CONAAT & Truenat machines amenokogo ta pai ashi.

Iba sentong ya NTEP-i "Yes! We can end TB: Led by Bharat, powered by Janbhagidari" omen nung ajemdaker agi.

NTEP indang nükjidongji strategy pezü- Detect, Treat, Prevent aser Build ajanga TB menatepba aser tasüba ajema kümdaksütsüba lir ta Dr Theyo-i ashi.

Iba maparen tajungba inyaksü atema health block shia nung CBNAAT aser Truenat machines dena molecular diagnostic facilities amenokogo. Külén Nagaland nung district ajak

nung ultra-portable handheld X-ray machines agütsüo ta paisa ashi.

Nagaland nung drug-sensitive aser drug-resistant TB patients angati anepalur aser Nikshay Poshan Yojana kübok nutritional support agütsür ta Dr Theyo-isa metetdaksü.

Robert Koch-i 1882 nung TB bacterium ngutetba bilemteta March 24 nü World Tuberculosis Day amunger. TB bacterium ajanga diagnosis aser treatment nung temelenshi tulu angu ta pai ashi.

India nung TB Mukt Bharat Abhiyaan kübok 2015 nungi TB incidence 21% ajemogo. Iba scheme kübok rapid molecular testing laboratories 9,300 amenokogo aser iba ya alima nung diagnostic networks tulutiba rongnung ka lir ta Dr Theyo-i metetdaksü.

Alima nung 2030 tashi nung TB samatsütsü nükjidong lir saka India-i iba dang jelia 2025/2026 tashi nung TB samatsütsü alizüng yur inyaker. Iba asoshi 100-day intensified TB elimination campaign densema maparen balala inyaker ta paisa ashi.

Dr Theyo-isa Ni-kshay Mitras indang jembidang kija aser

teloktemi nutritional aser psychological teyari ajanga TB agi shirangertem yaritsü ayongzük.

"TB anema inyaka aruba nung tajung-tamajung ajurua arur aser senotsü den alima nung tensa balala ajangshiba ajanga tayongzükba balala ajurur. 2026 omen ajanga linüktemi alizüng nangzükshiba masü saka nangzüka alibatem mapa akümtsü nenshir. Iba mapa nung sorkartem, civil society, shirangertem, private sector aser sendaktepa alir ajak külemi inyaksüla" ta Medical Officer Dr. Swuduvelu-i ashi.

"Iba omen ajanga teimla agütsür aser lenisüba tajung den senotsü endokba aser WHO-recommended innovations ajanga TB samatsütsüba ya takoktsü lir ta nenshir" Dr. Swuduvelu-isa ashi.

Iba sentong nung State IEC Officer, Thungchanbeni M. Humtsoe menden liasü, State PPM Co-ordinator Temjenochetla Ao-i temoatsü meshia sarasadem, SCTE-K Vice-Principal Dr. Runi Nakro-i tesentepertem pelaa agizük aser Finance Consultant Vilekho Bio-i anküp tepela o jembi.

Nagaland education system melenshitsu atema lennirtem arangshir

Dimapur, March 24, 2026 (TYO): Nagaland sorkari District School and System Leaders Professional Learning Community tenzükogo.

Nagaland nung education system tashi aittsü aser temelenshi bener arutsü atema iba maparen tenzük.

"Tashitait education system ka asütsü atema tongshi asem-school leadership, curriculum, aser administration nung amendaka lir" ta School Education & SCERT Advisor Dr. Kekhrielhoulie Yhome-i ashi.

Asenoki infrastructure, connectivity, human resources meperiba aser tanga tayongzükbatem atema inyakdang item tongshi asem ya tashi itdaksütsüba ta pai ashi.

Sorkar school tem yanglushitsüba atema tongti süa temulung agütsür. Professional learning community amala maparen ajanga public education system nung temulung alemtsü aser tajungba melenshitsu ta Advisor Yhome-i ashi.

"Nagaland nung school 249 nung baseline survey ka agiogo aser iba den külemi School Quality Assessment and

Accreditation Framework (SQAAP) agiogo. National Education Policy den liromedema Nagaland nung nüngdakbatem den putepa world-class curriculum ka yanglutsü meranger" ta paisa ashi.

DSSL PLC tenzükba mapang Deputy Director SCERT, Nagaland Benjung Yaden-ia School Leadership Development Programme (SLDP) indang osang lemsatep.

National Institute of Educational Planning and Administration kübok National Centre for School Leadership amenokogo aser iba ajanga School Leadership Academies lapokogo ta lai ashi.

Iba programme ajanga school tem nung lenisüba tashi itdaksütsü nükjidong nung lir. Nagaland nung school heads aser senior teachers asoshi one-month certificate course den head teachers atema sentong balala agiogo ta Yaden-isa ashi.

National Education Policy 2020 den liromedema SLDP ajanga professional development aser leadership skills nung temulung agütsür. Iba ita ka

course ya shilem asem lemsar agir aser iba nung classroom training, school-based project work, aser final assessment meyokteper, ta laisa shisem.

"Nagaland nung tesayur noklang aikati iba programme kübok training agiogo.

Kaketshiri angazükba nung school leadership ya kanga tongtipang ta bushitetogo aser iba jagi iba course ya professional advancement asütsü atema meranger. Sorkar department tem, partner organisations aser tesayurtem o SCERT faculty-i pusema nungitba ajanga SLDP tejakleni aoer. Iba mapa ajanga school systems tashi aittsü aser state ajungalen shisaliok jenjang tajungba akümtsü nükjidong lir" ta Yaden-isa metetdaksü.

"Tanü putu nung student learning ajungtsü aser school akangshitsü atema innovative maparen inyaksü nüngdaker" ta Secretary School Education, Mhathung Tungoe-ia ashi.

Professional Learning Communities (PLCs) ajanga tesayurtem aniteter aser School Leadership Academy, SCERT-i National Centre for School

Leadership, NIEPA, New Delhi, o NECTAR P3 consortium den yaritepa Nagaland nung District School & System Leaders Professional Community (DSSL PLC) tenzükogo ta Tungoe-i metetdaksü.

DSSL PLC ajanga educational leaders network tajung ka adoktsü aser iba ajanga Nagaland ajungalen education jenjang tajungba akümtsü ta paisa ashi.

"Ita ka leadership programme nung lennir 385 shi arangshio" ta Principal Director, School Education, Shashank Pratap Singh, IAS-ia ashi.

Iba training ya kanga tongtipang aser NEP 2020 ajanga tesayurtemi professional development courses agitsü tuyur ta pai ashi.

School Leadership Development Programme (SLDP) atema tesayurtem ajaki kechi südir süaka agitsüla ta masü angazükbaji mapa küma inyaksüba nung ang temulung agütsütsüla. Jelia tesayurtem jangjatsüla aser parnok training agidaksür jenjang ajungkettsüla ta Singh-i metetdaksü.

Taintem asoshi functional literacy ajungkettsü atema

Understanding of Lifelong Learning for All in Society (ULLAS) agir. Iba ya district 11 nung agir aser 7 nung survey agiogo. Training agiba yagi dangbo meperir saka teti nungittsüla aser DEOs o SDEOs atema structured sessions talila nüngdaker, ta paisa ashi.

"Nagaland ya best-performing states rongnung ka lir aser NEP inyakba nung tongti shilem agir. Nagaland nung Professional Learning Communities (PLCs) aniokogo" ta Assistant Professor NCSL, NIEPA, New Delhi, Dr. Yogesh Pahariya-ia ashi.

"PLC ya telok ka dang masü saka sobaliba ka lir aser idaki tesayurtemi angazük, olemteper, ainer aser khuret lemsateper. Iba ama sobaliba ajanga lenisüba tajung yangertsü aser shisaliok tajungba akümtsü lenmang lir" ta Dr. Pahariya-isa ashi.

"Kodang lennirtem külemi angazükdir, school tem külemi renlokdir, kodang school tajungba kümdir, state renloker aser kodang state renlokdir, linük külemi tejakleni aoer" ta paisa ashi.

Longsa Senso Moria Mission atema ki ka yangertetogo



Landmark colony, Dimapur nung Longsa Senso Moria Mission ki lapoka sarasadem mapang agiba noksa nung angur. (Dimapur, March 24, 2026).

Dimapur, March 24 (TYO) : Longsa Senso Moria Mission atema Dimapur nung yangluba ki tuluka tanü Sangtenu Nagaland RD & SIRD kilonser Wb.Metsübo Jamiri lapoktsü aser Longsa Baptist Arogo nung sannüker Rev.Süpongchiteni meshiteta sarasademsü. Iba ki ya Longsa lima mezüng Khristan yimsü agizüker Repjenyuba aser Sakusangba na 'Memorial Comlex' ta tenüng agüja lir.

1971 küm Longsa lima nung tanela asentenshi tulu adoka nübertem temulung meyip aser tanela khuret bena alima tesem balala nung sama aliba tanelatem kümzüksü asoshi sensosangertem lungjemer tenzüka, Longsa Senso Moria Mission mapa atema iba ki ya sen crore 3.68 shi endoka yangluba ki ka lir. Iba ki nungi aruba senotsü agi Longsa Senso Moria Mission ajanga 'kintem dangi osangtanjung sangdongba' mapa inyaksü parnok temulungtetba sarasadem lir.

Iba ki lapoktsüba sentong nung Tsüngrem nem tenüngsang agütsüba o ka lemsatepdang, "Tsüngremi asen lima aser nübertem kanga moatsüogo, anungji aji teti züngdanga Tsüngrem sanga

alitsüla," ta Wb.Metsübu metetdaksü. "Aiben asenoki asen nem moatsüba temoatsü mangur aser mezüngdang saka tangar nem moatsüba temoatsütem dang angur. Iba amaji mesüi asenok nem moatsüba temoatsütem reprangteta Tsüngrem tenüngsanga alitsüla, "ta paisa ashi. Wb.Metsüboisa iba ki yangluba nung Planning Cum Construction Committee purtem nem tenüngsang agütsü.

Iba kasa sentong nung Longsa nung Nagaland nungi Lok Sabha MP Wb.Süpongmeren Jamir-ia Longsa nungertem dang Tsüngremi moatsübatem mamadoki ano asentenshir Tsüngremer osangtanjung sangdongba mapa tuluba inyaka aotsü ayongzüik.

Iba sentong nung Mongoya Assembly Constituency nungi adoksang MLA Wb.Imkongyanger-ia Longsa sensosangertem inyakba mapa tajung asoshi pelaba o lemsatep. Kasa sentong nung Longsa Village Council nungi Wb. Noklenrenba, Longsa Gazetted Officers' Union nung tir Wb.Temsününgsang aser Longsa nung anükapangtem tenüng nung Wb.I.Anungba

Sanglir, Additional Director, Food & Civil Supplies, nungertemi tepela o jembia liasü.

Iba ki yangluba osang lemsatepdang, iba ki yanglutsü asoshi 2012 küm mezüng senden mena tenzüik aser ki asüba mapa 2018 küm nungi tenzüka sensosanger aser anükapangtemi mulungsua yaritepba agi takok ngua inyaktetogo ta Planning & Construction Committee nung tayonger Wb.Lipokmeren Jamiri metetdaksü. Iba ki ya aluyimertemi alu nungi züsentetba nungi tenla abenba nungi tenzüka temulunger tenlatem bendenba agi sen crore 3.67 dak tali bendentetba agi yanglutetogo ta paisa tenla agütsür ajak dang pelaba metetdaksü. Iba ki ya anünglen pezüben tashi tua atongtepa yangluba ki ka lir.

Iba sentong lemladakja Kr.Moajunglai ken tajung ka aten aser Mission Board tenüng nung Wb.Yashikabai mulungnen o lemsatep. Iba sentong tenzüka Longsa Home Missionary, Wb.Tiayangar-ia sarasadem aser Senso Missionary Wt.L.Mapukalai sarasadema tembang, Iba sentong nung lenir APW Wt.S.Moala liasü.

EPFO-i Dimapur nung EPF indang awareness camp ayongzüik

Dimapur, Metsüremi/March 24 (TYO): Department of Labour ajanga Ministry of Labour & Employment, Government of India kübok Employees' Provident Fund Organisation (EPFO) den lungjemer Employees' Provident Fund (EPF) indang awareness camp ka March 24, 2026 nü Assistant Labour Commissioner, Dimapur nung ayongzüka liasü.

Iba campaign ya November 1, 2025 nung tenzüik aser April 30, 2026 tashi alitsü, kong employers temi Employees' Provident Fund (EPF) scheme kübok taoba mapang meimyakba regularize asütsü aser temsüa aliba employees züngdoka alirtem tenüng züluoktsü asoshi ita trok mapang agütsür.

Iba sentong nung Regional P.F Commissioner, Special State Officer, Dimapur, Samuel Das-i July 1, 2017 aser October 31, 2025 tsüngta mapa nung aniokaka taoba mapang enroll

mesüi aliba employees tenüngtem employers temi sangdongtsü akok, ta metetdaksü.

Ibai social security tashi itshia employees aser parnok kibongtem nem 'financial protection and stability' agütsütsü asoshi lir. Das-i Pradhan Mantri Viksit Bharat Rozgar Yojana nungi tajangzüik anguba indang tongmelang agi rasaa ashi, koba linük tesem ajunga nung employment generation tashi itshitsü nükjidong nung lir.

Iba scheme indang outlay ya sen 1 lakh crore shi lir aser mapa 3.5 crore dak tema adokba nung yaritsü aser first-time employees aser employers generating additional employment atema teyari agütsütsü.

Dimapur nung aliba EPFO office ajanga EPF dak sendakba nung yariteper aser Nagaland tesem ajunga nung scheme balala tajungba nung mapa kuma inyaksü asoshi yarir ta pai

metetdaksü.

Pao employers teinyaksü indang lemsatepdang, ita shia ECR ajanga anogo 15 buba matongdang dues tem menoktsüla aser menuba ajanga penal charges meshitsü, ta ashi.

Anungji employers temi PM-VBRY kübok registration asütsüla, employees aser parnok kibongtem tangotsü tim bushiba nung yaritsüla, official online portals ajanga PF dak sendakba transactions ajunga inyaksüla, ta Das-i ashi.

Employers temi contractors ajanga inyakdaksür densema temsüa alir employees ajunga tenüng züluoktsü aser ECR filings den taa agütsüba kanga junga achayangtsü ashi.

Pai Employee Enrolment Scheme 2025 indanga rasaa ashi, koba November 1, 2025 nungi amshir aser employers tem dang pei sasa temsüa aliba employees tenüng sangdonga tenüng züluokdaksütsü ajungshia liasü.

KMC lenir atema March 30 nü election agitsü

Dimapur, Metsüremi/March 24 (TYO): Kohima Municipal Council indang Chairperson aser Deputy Chairperson atema election ya March 30, 2026 nü Deputy Commissioner, Kohima indang Office Chamber nung agitsü.

Iba atema state sorkari melaba sülen Nagaland Municipal Act, 2023 nung mela aliba ama Deputy

Commissioner, Kohima, B. Henok Buchem, NCS-i senden ayongzüko.

Iba senden nung Kohima Municipal Council indang elected councillors ajunga adentsü metetdaksür, ta sangdong ajanga ashi. Iba senden nung Act kübok shia aliba ama quorum nüngdakbatem shidak amshitsü, ta sangdong ajangasa ashi.

Mokokchung nung World TB Day amung, 100 days TB campaign tenzüik



CMO Conference Hall, Mokokchung nung March 24, 2026 nü World TB Day aser 100 days TB campaign tenzüikba mapang Mekuli Village council züngsem-i TB Mukta Panchayat indang Certificate aser Memento agizükdang tangokba noksa nung angur.

Dimapur, Metsüremi/March 24 (TYO): Chief Medical Officer, Mokokchung indang Conference Hall nung March 24, 2026 nü "Yes! We can end TB!: Led by Countries, powered by people" omen kübok World TB Day aser 100 days TB campaign tenzüikba sentong agia liasü.

Iba sentong nung Chubamongla, EAC, Chuchuyimlang ajanga jembidang, "TB anema raraba nung asendenshir bendanga agütsütsü aser awareness prokshitsü nenshia asenoki TB Day ya amunger," ta ashi.

Lai shilem agirtem, NGOs aser village councils tem dang Medical Department-i iba sentong mapa kuma inyakba nung yaritsü ayongzüik, koba ajanga sentong tashi itshitsü aser TB samadaksütsü nükjidong tongtettsü ta ashi.

Dr. R. Toshimenla Jamir, DTO ajanga iba anogomung ratet lemsatepdang, alimai World TB Day amunger, aser iba anogo ka iba tashidak anema raraba nung awareness agütsütsü aser lungjemtsü asoshi lir, ta ashi.

Tuberculosis, koba dang TB ta ajar aser ibai menatepba tashidak tejentiba rongnung ka lir, koba alima nung public health tsütsü timtem tulu agütsür, aser küm shia nisung million aika dak kongshir.

Taküm World TB Day omen ya "Yes! We can end TB!: Led by Countries, powered by people" lir aser iba yagi alima mangdang asangsang nung mapa kuma inyaksü sayur, linük temi anir sorkar, nübertem, TB

agi kongshir alirtem, civil societies, donors, lanurtem, development banks, technical agencies, researcher, private sector etc lungjemer mera agitsü indang jembir, ta ashi.

Taküm indang omen ajanga tanen makai bendanga agütsür inyaksü nüngdakba, national leadership, senotsü peria indokba aser nübertem shilem agitsü nüngdakba indang ashir. Asenoki World TB Day 2026 amungdang, education, early detection aser access to treatment ajanga iba tashidak anema lungjemer raratsü tongtipang akumer, ta lai ashi.

TB nungi jenbua liteter aser taneptsü nguteter aser asenok külemi asen lima nungi iba tashidak samadaksüba nung temelenshi tulu adokdaksütettsü.

Dr. Tiasunep, Chief Medical Officer, Mokokchung ajanga iba sentong nung pela agizüka o jembir aser Chingmak Imlong ajanga TB champion ama pai ajangshiba lemsatepa liasü.

Rev. Moatoshi Jamir, Counselor, MTBA ajanga sentong tenzüka sarasade, aser Imcharen, STS ajanga melepzüng o jembir.

Chubamongla, EAC ajanga yimtsüng asem - Mekuli (Silver), Kelingmen (Bronze) aser Moalenden (Bronze) nem TB Mukta Panchayat indang Certificates aser Memento agüja liasü.

Iba sülen tashidak putetba tali akumtsü, TB agi asüba ajemtsü aser cases tasen nokdangtsü nükjidong nung "Launching of 100 Days TB campaign" tenzüka liasü.



Asia anüolen rara adoker aliba ajanga totzü agi anünga akümtsü ta olulu osang prokshiba sülen Nagpur nung nüburtem gas station ka nung totzü alitsü atema tarensena atatepba noksa nung angur.

Odisha: Maoist commander Sukru bendanga agütsüogo

Bhubaneswar, Metsüremi/ March 24 (Agencies): Maoists state committee züngsem Sukru Kandhamal district nung bendanga agütsüogo. Pai AK-47 rifle ka bena liasü. Pa atema sen lakh 55 agütsütsü nangzüker liasü, ta Odisha DGP YB Khurania-i Mongolbarnü ashi. Pa ya Maoist commander tongtibattem rongnung tatembangbuba liasü ta züngshir.

Pa den külemi ano Maoists züngsem pezü bendanga agütsüogo, koba police-i ashiba agi, state nung Maoist pur inyakyim aziüoktsü merangba mapang takok tulu ka lir.

Sukru ya Malkangiri district nungi lir aser pa ya Odisha nung Maoist züngsemtem rongnung tejentiba ta züngshir aser pa kübok züngsem 13 shi liasü, shirnok timba Chhattisgarh

nungi aser Kandhamal nung inyaksangshia liasü. Khurania-i ashiba agi, pai tawa "Eighth Company" ta nüngja agütsür telok tasen ka ketdangüsü liasü, koba iba tesem nung Maoist inyakyim maneni tejakdangi bener aotsü nükjidong nung tenzüka liasü.

Ketdangürtemi ashiba agi, Maoist züngsemtem ketdangürtem nem bendanga agütsüba ya Sukru-i anema liasü. Taküm January ita pai divisional committee züngsem aser military platoon commander Anwesh tepset shiba bendanga agütsünüa liasü. Anwesh indang tasü mang ya Shila aser Jogesh na teyari agia arem nung rema toktsü. Iba sülen Jogesh ya February 22 nü security force tem den khatapba mapang tepset.

State nungi Maoist pur

inyakyim raktoktsü atema jenjang tali agiba mapang item züngsemtem bendanga agütsüogo. Chief minister Mohan Charan Majhi-i Hombarnü Assembly nung ashiba agi, Odisha nung Maoists züngsem 15 dang anunga lir. Paisa, taoba küm ana tsüngda Maoists pur 96 bendanga agütsüogo, ta ashi.

Tawa bendanga agütsürtem rongnung Sanu Pottam-i anir March 11 nü züngsem 10 bendanga agütsüba aser Nakul-i anir March 15 nü züngsem 11 bendanga agütsüba densema lir. Ketdangürtemi ashiba agi, Sukru bendanga agütsüba ajanga tanungba züngsemtema bendanga agütsütsü ajungmesotsü. March 31 nü tashi nungbo Odisha nungi Maoist pur meshi meshia samatsütsü nükjidong yur inyakdar.

Kashmiri Separatist Asiya Andrabi taküm tepeyong tepuokdak ayutsü

New Delhi, Metsüremi/ March 24 (Agencies): Delhi nung okadak kati Mongolbarnü Kashmiri separatist aser Dukhtaran-e-Millat tekolakba Asiya Andrabi, Unlawful Activities (Prevention) Act (UAPA) kübok taküm tepeyong tepuokdak ayutsü obendang agütsüogo.

La nem teyari agütsür Sofi Fehmeeda aser Nahida Nasreen nata küm 30 tepuokdak ayutsü obendang agütsüogo.

Parnok asem ya UAPA kübok provision balala dak ajemdaker January 14 nü aitsü. Parnok aitsüba nung linük anema raratsü merangba aibelen densema lir.

Agency-i ashiba agi, lai

India anema raratsü merang aser state anema nokdakertem nem osang tesashi ka agütsütsü nüngdaka liasü.

Jammu and Kashmir nungi Article 370 aginba sülen UAPA kübok NIA court kati aitsüba separatist lenirtem rongnung Andrabi ya tanabula lir.

NIA-i ashiba agi, aija alirtem yagi tenokdangba agütsür aliba Dukhtaran-e-Millat ya amshia nüburtem mesüngjemteti kümdaktsütsü aser India nungi Jammu and Kashmir jakzüka yoktsü meranga liasü. Agency-isa, court dang ashiba agi, Andrabi ya ozüng raksar ka aser la anema Jammu and Kashmir kübok tesem balala nung FIR

33 benoka lir.

La nem teyari agütsür Fehmeeda aser Nasreen nata ken o aika nung sendaka lir. Tena anema FIR teku aser pongu benoka lir. Parnok ya UAPA kübok section 20, 38 aser 39 nung aibelenba atema aitsüogo, koba kiralongrar telok nung züngoksemba aser item teloktem pusemba dak sendaka lir.

Arishi küm 62 tain Asiya Andrabi ya Dukhtaran-e-Millat (DeM) ngutetla lir, koba mezüngbo loktiliba temelenshi atema nokdakba telok ka liasü. 2018 küm centre sorkari iba telok ya kiralongrar telok ka ta sangdong aser tenokdangba agütsü.

PM Modi-i Rajya Sabha nung Middle East tebilemetsü lemsatep

New Delhi, Metsüremi/ March 24 (Agencies): Ato Kilonser Narendra Modi-i Mongolbarnü Rajya Sabha nung o jembiba mapang, Asia anüolen tang rara adoker aliba ajanga alima ajunga nung energy dak sendakba nung tebilemetsü tulu adokogo aser shishilembatsü atema amshiba lenmang tongtibattem dak kongshio, koba ajanga India rongsenketzüng aser supply chain tem dak kongshir, ta ashi.

Upper House nung jembiba mapang Modi-i ashiba agi, iba rara yagi khu shibelenba dak kongshio aser petrol, diesel, gas aser fertiliser amala tongtibattem osettem supply koda asütsü mejangjai kümogo.

"Iba tensa ya India asoshia tebilemetsü lir," ta pai ashiba den, rara ajanga shishilembadang amshiba rongtem senzüba lenmang dakbo kongshitokogo, ta shisem.

PM-isa, Iran-i Strait of Hormuz ajanga rongtem mesenzüdaktsüba ya agizüktsü makok ta ashi. Pai ashiba agi, India-i ken o dak sendaka alir ajak den diplomatic channel tem ajanga tongtepratepogo aser rara agi kongshir aliba tesem



nungi India nunger rongtem takok ngua aninogo.

"Mepetmesü adoker aliba mapang asenoki sensaksem ajanga ken o bentettsüba lenmang shimogo," ta pai ashiba den, rara tenzüka sülen India-i Asia anüolen aliba linük lenirtem den jembio, ta ashi. Paisa, New Delhi-i yimjung nung ken o bentettsü pusemer ta nenshia metetdaksü.

Maneni Modi-i, Gulf nung aliba India nungertem kümzüka toktsütsüji ajak dang tongtibattem lir ta ashi. India nunger million ter shi iba tesem nung alir aser mapa inyaker.

Paisa, Strait of Hormuz nung taolen makai aliba India nunger rongtem indang crew tem asoshi shisabulua bilemba lemsatepogo, aser parnok takaratiba nung anir arutsü inyakdar ta ashi.

EC shiti nung BJP seal ajenoker aliba ajanga mepetmesü adok

New Delhi, Metsüremi/ March 24 (Agencies): Election Commission-i yokba shiti nung BJP Kerala unit indang seal ajenoker aliba ajanga mepetmsü adoka liasü.

CPI(M)-i iba ken o ya social media sabang X nung benok aser linük ajunga nung March 19, 2019 nü political party balala dangi yokba shiti ka lemsatapa liasü, kong Election Commission indang official seal masü saka BJP Kerala seal ajenoka liasü. Iba sülen Congress-ia EC aitsüogo.

Ajisüaka Election Commission-i iba ya aibelen ka dang aser metongshio ta shio.

"BJP seal keta aliba Election Commission shiti ka Malayalam news channel tem nung prokshiba onoki angazükogo. Office of the Chief Electoral Officer (CEO)-i iba ya aibelen ka dang aser metongshio ta jangjashitsü," ta Kerala Chief Electoral Officer (CEO)-i metetdaksü.

Iba tatalokba indang rasa ashiba mapang CEO office-i ashiba agi, "BJP Kerala Unit-i tawa candidate tem criminal antecedents sangdongtsüba dak sendakba nung 2019 guideline jangjashitsütsü asüngdanga liasü. Iba temepishiba den külemi party-i original 2019 directive photocopy ka agütsü. Iba copy nung party indang seal

keta liasü.

"Office-i parnoki benokba kuli kakat nung party temaitsü aliba mongui ken o jangjatsütsü mepeshiba nung shilem ka ama political party tem nem shiti lemja liasü," ta EC-isa metetdaksü.

"Aibelen ngutetba sülen Chief Electoral Officer office-i jenjang tapet agia March 21 nü Deputy Chief Electoral Officer-i iba aibelenka yokba kuli kakat meyipa agiba forlam shiti ka yokogo," ta kasa sangdong ajanga metetdaksü.

CEO indang office ajangsa, nüburtem aser media dang aibelen dak ajemdaker osang tai meperokshitsü mepeshia metetdaksüogo.

Iba dak sendakba nung CPI(M)-i, "centre-i Election Commission of India aser BJP na aziükba ya kecha miim o ka masü. Desk danga balala ana ayu nung ajungtsü," ta ashi.

CPI(M)-isa, clerk temi aibelenka ta parnoki ashir. Election Commission kuli kakat nung BJP seal ka keta aliba ya aibelen ka dang ta shia ajem ajema aginogo. Ruling party aser constitutional telentem kodang tebandang makai kümdir aji aibelenka masü kasa tekümdangtsü ka lir. Election ya democracy tongtoret lir. Aibelen ka dang süaka iba ya kanga tulu lir. Sihibai khuret abentsü," ta party-i X nung zülutsü.



Prayagraj nung Hombarnü cold storage ka chirepba sülen National Disaster Response Force (NDRF) personnel ka hazmat suit semer senzüba noksa nung angur. Iba lendong nung mapa inyaker pezü asü aser 14 yirua liasü aser iba den facility nungi ammonia gas leak süa liasü.



TIR YIMYIM

YIMOBILEM (EDITRIAL)

DIMAPUR WEDNESDAY, FEBRUARY (METSUREMI) 25, 2026

Rongsen ya teti atema masü!

Alima nung takartiba yimitem rongnung pezübuba Dubai yimti nung alirtem ajak ya takartem dang lir. Iba yimti nung millionaire nisung meyirijang 86 aser billionaire 23 lir. Aji oda, United Arab Emirates lima nung rongsen jateta adoka moludak yimti Dubai ya lir. Ashiko, asenok Naga nungertem rongnunga karbo Dubai tashi nunga kiojen akatsüa akok, kechiyong alima nung takartem ajaki iba yimti nung pei meyong ali rongsen langka kabosa yangerteta yuner. Ajisüaka, tanga Gulf kintemji toktsür, tanü Israel aser US nati Iran amakba sülen hapta asem tsüngda UAE lima nung Dubai yimti taji repringdangra, anogo 24 jakdang alima nung jangratemtsü lima asüba yimti to tanüba iba yimti nung telinür mali kümogo. Aji oda, iba yimti nung kiojen tajung yanglua akabatem aika Iran nungertemi missiles aser drone bomb meyirijang ana shi yoka raksatsüba agi, tanüba Dubai nung akaba rongsen aika jana rüja kümogo. Kasaji, Iran-i tanga Gulf limatem Bahrain, Kuwait, Iraq, Oman aser Saudi Arabia nunga totzü atsüa moludak aser rongsen jatetdak tongtibang tesemtem poksatsüba agi alima nung takartem aika manger sangwa nung sensaker kümogo. Item dang nungi ano tali takoksa angurtemji Iran nung tematiba lenir Ayatollah Ali Khamenei-i anir par kinungertem asütsü, kechiyong parnok ya alima aika nung rongsen tulu amenoka akaba nisungtem liasü. Ajisüaka, item ajakji yutsür pa den par kinungertem aser pa den külemi yimsüsür tongtitem ajak Israel aser America nungertemi lilang nungi mopong nung yokba injang aser bomb ajanga pokseta südaktsüogo. Aji oda, tanü alima sünga Iran lenir Ayatollah Ali'er rongsenji asadanger masadangtet liaka, tebushir-a mali aser tagir-a mali kümogo. Itemji kodang bilemdangdir, alima nung ya nisung shinga teti atema jenoktsüsabo tesem kecha nunga mali ta angateter. Tanü asenoki tangarbo shinga mali ama, asen kija agitsü dang bilema rongsen bendenba ya, ashiko, asüngbo asenoka Iran aser Dubai nung atalokba amaji manger sangwa nung jana rüja akümtsüa akok. Ashiko, asenoka menua melii tarutsü nungbo asen ki toktsür tanga limai jena aotsüsa tensa mapang agi bener arutsütsüa akok. Aji oda, shibaibo asen lima nungbo tanü Iran aser Dubai nung atalokba amaji mataloktsü ta shitetsü? Shibaibo tanü Iran aser Dubai nung takartemi peisasa bendenba rongsen magishitsüsa akümba amaji asenok dakbo mataloktsü ta shitetsü? Alima nung nisung shia pei nungdak aika lir aser item nungdak atema asenoki inyakba nung Tsüngremi moatsür. Ajisüaka, asenok aikati asen nungdak dang nungi talila bushi dang, temoatsü agi lendong akümtsüsa asenoki inyaker, kechiyong asenoki tangar meyong rakzüka takar akümtsü meranger. Aji oda, asen takar akümba agi nisung aika makar kumdaktsüra aser asen takar akümba agi nisung karbo teti sensaker süa alitsüsa kumdaktsüra, khen bilemdangdi, kechiyong asen akabaji asüng Dubai nung akaba rongsen amaji anak auyi dang kümra, koda? Aji oda, asen takar akümba agi kar taneptsü angutsüba ser nung mangutsüsa kumdaktsüra aser karbo kaketrejui otetsüba ser nung moutet anendaktsüra, chiyongbo mathitsüba ser nung athitsüsa timtem aser maksü ajurudaktsüra, asenok tajangzükji kechi asütsü? Tanü alima nung takar aika rongsen bendenba yur, Ayatollah Ali'er kinunger amaji senmanger mali samadokba purtem aika lir. Kasaji, alima nung yimti tajung - tajung bushia oagi kiojen tajung yanglua akar shishilembar tular aser yimsüsürtem aika lir, ajisüaka itemji Dubai nung akaba pei kidang tetsüba agi tali majung akümba amato kumadokra, kechi sütsü? Ashiko, asenoka karibo Nagaland nung anguba rongsen agi Nagaland topur junga yanglutsütsü aser Nagaland nung alirtem rongsen jenjang tajungba kuma ajungkettsütsü melen bendanglen tangari yangerteta akaba yimti topur tajungtem nungang pei rongsen rezünga alitsüa akok. Ajisüaka, asüng item yimitemji Iran aser Dubai amaji poksatsüra koda? Asenok taküm tia ya asen ket nung mali, Tsüngrem ket nung dang lir, anungji Tsüngrem tsübuttsü aser pei nungdak dang tali rongsen bushitsü melena tangar asoshi temeim mapa-ang tali inyaksüba agi shisatakaba aser tajungba lir. Iba shisatsü aser tangatetba jagiang Nagaland-a asenok ajaki linütsüka topur junga yanglutetsü.

OLEMSABANG

SANGDONGER

-Dimapur Area Ao Baptist Ordained Ministertem aser Pastortem.

Tanü lima nung yi ayokba aser ajemba ajanga temang nung timtem, rongsen-ketsüng aser lokti nung tebilemstü jenti bener arutsür, item ajak ya arogoi-a süoki yia bilemer. Ajisüaka, item timtem aser tebilemstütem ajanga NLTP Act, 1989 agiendi ta asübaji arogoi magizüker.

Arogoi NLTP Act-ya sorkari mapa kuma meinyakba ajanga ta jangja-jangja repringtetter. 'Arogobo tanela atema dang inyakang' ta lokti aikati jembibaji tim masü. Arogoi tamanger ajak takum liba-liro nung asüngteta aser meruka alitsü asoshi tesayuba agutsüba lokti lir. Tanu NLTP Act tamakok ngua lir ta jembibaji tanga agi masü saka yimden-yimsüsür tebilemba tajung maliba (lack of political will), ochimashi (systemic corruption), aser telok-telok (syndicate networks operating from top to bottom), iba den Naga national groups adenba ajanga lir ta arogoi angatetter. Anungji, item kulitem ajanga sorkari ozüng mamshitetba aser yimsü mesütettba shisangdaksür; NLTP Act tamakok masü!

Sorkari ozüng mamshitetba-yong NLTP tamakok ta tongloksür, pei teinyaktsü meinyaki jenzüka (retreat) aobaji kenyongi tim masü aser yamala jakla jagi Naga lima shirangba kodanga manüptsütetsü.

Tsüngremi arogo nem nungloksüba ama, lokti neburtem temeshiba nung aser tiptema litetsü asoshi arogoi item ya sorkar ajanga inyaktsü rongdak nungdak kar tuteta zülur.

Ozüng amshir shitak tentetsüla (Constitute State Council and District Prohibitory Committee)

NLTP Act tapu III, Rules no 25, 26, aser 27 nung Director of Prohibition Officer, Prohibition Council & Committee shimtsü melaa lir. Saka Temzüng nung liaka itemji kodanga meshim aser mapa kuma tanu tashi meinyakdang.

Miimetua telung nung inyakba telok samatsütsüla (Dismantle Syndicate and Covered Network)

Tanü lokti nung aser NLTP maparen nung timtem tulutiba rongnung kaji syndicate system ya lir. NLTP actji agienra, item syndicate teloktem tashi ang tali agütsür asütsü ta animesüngzüktteti bilemer. Anungji sorkari item miimetua telung nung inyakba telok (syndicates) ajak anendaktsütsüla. Akhidangbo Naga national worker-temia yi majemtsü nüburtem dang shia liasü, saka tanüba parnoki-ang anir yi ayokba ya mangdang tejangja maliba sayur.

Tim bangdak nem tashi agüjang (Empower Enforcement Authority Excise Department)

Sorkari Nagaland Excise Department nem yi nokdangtsü tim tashi agutsütsüla. Yi nokdangtsü nungtem nung shimba lokti nem bangdak aser tashi ajunga magutsüba ajanga, yi nokdangba maparen ayimjema aser sadema meinyaktetter aser tamakok angur.

Nungdakba teyari teperi agüjang (Provide Sufficient Resources)

Sorkari Nagaland Excise department nem sepai nebu teimba (more Excise personal) aser nungdakba rongsen (budgetary) ajak peria agutsütsüla. Senotsü aser sepai nebu peria maliba ajanga yi nokdangba ayimjema meinyaktetter.

Aibelener nem tapet temerenshi agüjang (Accountability and Stringent Punishment)

Shinga tejak mereprangi aibeleneritem nem tim temerenshi agütsütsüla. Yi shibeleneritem dang masü saka police/Excise mapa nung tim masüba mapatem inyaker item ajak temerenshi tesashi agutsütsüla.

Temzüng tashi itshiang aser metokmerperi repringshiang (Strengthen the NLTP ACT by Removing Legal Loopholes)

NLTP Temzüng No 16 koba nung 'Special permit' aguja lir, ibala temzüng dak ajemdaker, yi nokdangba mapa takok ngua meinyaktetsüsa akumer. Anungji yamala temzüng koba ajanga ozüng amshitsü nung tapok adokdaksür, itemji agientsüla.

Tawa, civil society lokti balalai yi tajung (quality liquor) yokra/ jemra, nisungtem timtem malitsü ta jembitepba tangatetba arogoi magizüker. Naga nunger ajak taküm, shisatsü aser tanela ajak wazüka kumzüka ayutsü nukla nung arogoi sarasadema mangdang tulu yur inyaker. Yamaji, tarutsü putu asoshi mangdang tajung akaba lokti ama tebur, tetsür aser lanur tentet ajaki teka amteper inyaktsü ayongzüker.

Tanüa sang, asünga sang Khristar arogoibo Nagaland nung NLTP Act agientsü memelatsü. Alima yimden aser neburtem anitsü asoshi temulung lema shimteta yutsür, zübazülema senotsü ajangzüktsü mechi nung, neburtem mashileni anira parnok madak Tsüngremer atakatem kaotsü ta metetangma. Alima otsü nung yi nokdangba tamakok anguba indang aikati jembir, saka Naga nunger atemabo Yi-ji atakatemba ka lir. Nisüngi pei saksüba dangi meyipdima?

NLTP Act Tapu 2, temzüng 3 nung shia aliba ama Nagalima ajakji Dry State asütsüla. Arogoi iba Act sorkari mapa kuma inyaktsü asoshi sarasademtsür.

Tanga tesüa, arogoi alima tebilemba matsüngdang mapudaktsü saka ainkar ola adoka asen nüburtem kumzüka aser tajungba yanglushia anitsü asoshi tebilemba tajung akaba lokti ajak den teka amteper sarasadema inyaktsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Foreign funding bill ajanga makamaiter tali timtemtsü

New Delhi, Metsüremi/ March 24 (Agencies): India sorkari bendang lima nungi senotsü teyari aruba azüoktsü ozüing aliba yanglushitsü tebilemba aliba Catholic arogo lenirtemi aitsür, koba ajanga charitable organizations azüoktsü tashi tuluba agütsütsü. Charitable organizations ya aika Khristanpuri makamaiter yaritsü atema lapoka lir.

March 18 nü Cabinet senden ka nung agizükba Foreign Contribution (Regulation) Amendment (FCRA) Bill yagi charitable mapa atema bendanglima nungi aruba senotsü amshiba nung rangloksü sorkar nem tashi tali agütsür ta ashir.

Tang yanglushiba ozüing ya ajanga organization indang FCRA registration suspend sütsüba, agientsüba, meyipa agütsüba mesüra renew masüba sülen bendang lima nungi teyari agütsüba amshia yangluba 'assets' tem sorkari azüoktsü temelaba agüja statutory mechanism alitsü.

Iba den ano tasen Section 14B benok, kong mapang liwaba mesüra renew asütsü memulungba organization indang FCRA registration tembangogo ta züingshitsü tashi agütsür.

"Transparency,

accountability aser legal certainty" tajungba kumdaoktsü atema bendang lima nungi senotsü teyari aruba aser amshiba jangjatsü atema mapang tatakzük alitsü ta bill ajanga ashir.

"Iba yagi Arogo nung amendaka aliba NGOs aser danga minorities temi lapoka aliba nung kanga sashia kongshitsü. Bendang lima nungi aruba senotsü amshia aliba ali kimong tem lendong nung lir," ta Father Cedric Prakash, Jesuit human rights activist ajanga ashir.

Iba ozüing yanglushiba ya parliament nung agizükba sülen sorkari mela-mela alikimong, ki o jen aser senotsü agitsü ta putiri ashir.

"Civil society organizations indang-indanga azüoktsü atema sorkari ano mera tali ka agiogo," ta Prakash-i ashir.

Iba ozüing ya amshi tenzükra, FCRA licenses aliba, mapang süyir mesüra thir aliba charities ajanga asoshi lendong lir, ta pai ashir.

Prakash-i ashiba agi, ozüing ya hadir ama amshitsü atema sorkari mera agir, koba ajanga linük nung tajemzükba jenjang nung alir asoshi mapa tajung inyakba nung kanga mejungi kongshitsü-

"Makamaiter tem takoksa tuluba asütsü," ta pai ashir.

New Delhi nung aliba okatsür Sister Mary Scaria-i ashiba agi, iba amendment yagi civil society aser parnok organizations tem alena parnok bendang lima nungi senotsü teyari agiba aser freedom of association nokdangtsü.

"Makamaiter mesüra tepetzük tia nung alirtem maneni kinük leni nung aotsü," ta nun yagi March 23, 2026 nü osangbener dang ashik, shiba Sisters of Charity of Jesus and Mary indang züingsem ka lir.

India sorkari Hindu nationalist agenda bhukumba civil society telok tem kisüing bendang lima nungi teyari agidaktsüner amai ajiteter, ta arogo lenir kati ashir.

Ato Kilonser Narendra Modi indang sorkari NGOs anema iba ama mera agiba tang mezüing masü, shirnok 2014 küm mezüing yimden yimsüsüba mendeni aruba sülen Hindu mezüing südaktsüba policy nung jajar ta aitsür.

Iba sülen sorkari telok 20,702 indang FCRA licenses agientsüogo. Tang linük nung bendang lima nungi senotsü teyari agitsü mela aliba NGOs 16,122 lir, ta official data ajanga ashir.

Rara mechi Jerusalem nung tongtipang tekülem sentong athier

Jerusalem, Metsüremi/ March 24 (Agencies): Middle East nung rara aliba mechi Jerusalem nung nungtu Church of the Holy Sepulcher, koba Yisu kangi nung metaba aser aremba tesem nung yanglua ali, yangji Easter atongtsü lia akhi mapang nungi amshia aruba Holy Week külemkeja malitsü ta osang ka ajanga ashir.

Century pezü buba nung tenzükba Church in the Holy City nung taküm Mountain of Olives nungi yimti tashi Palm Sunday nung procession malitsü aser Holy Thursday nung Chrism Mass malitsü, ta Cardinal Pierbattista Pizzaballa, Latin Patriarch of Jerusalem ajanga sangdong ka nung ashir.

"Taküm rara aliba mechi, asenoki Jerusalem nung traditional Lenten journey majangshitsü, aser Holy Sepulcher aser Holy Places of the Passion nung sentong tila agitsü," ta Pizzaballa-i March 22 nü ashir.

Rara ajanga tenokdangba

agütsübatem aser anogo ishika tsüingta atalokba ajanga Holy Week nung sentong balala aliba nunga kongshir, ta pai ashir.

Mount of Olives nungi Old City tashi akhi mapang nungi Palm Sunday procession agia aruba thiogo aser iba melen Jerusalem yimti nung sarasadem mapang ka alitsü.

Putiri rara asoshi temulung khurema jembia liasü.

"Tang rara ajanga asenok ajak dak kongshir, külemi Easter memungtetba ya khuret talila bentettsüsa akumer. Rara ajanga zübu kettsür alidak ano iba ya zübu ka lir. Saka asenoki tezü tanga malitsüla. Asenoki jangraba ama asenok madenshitetaka, asenoki sarasadem manentsüla," ta pai ashir.

Pai iba melen nisung ajak dang sarasadem mapang agitsü ayongzükka liasü.

March 21 nü Franciscan Custody of the Holy Land ajanga Basilica of the Holy Sepulcher shibangtsü osangtem aliba dak sendakba

nung sangdong ka agüja liasü.

"Holy Sepulcher nung aliba Franciscan friars, anüing dang mesüra amman nung kodanga teinyaktsü meinyaki meliasü. Tanü-asünga security mechi Basilica-i aotsü tenokdangba agüja liaka Holy Places nung maneni sarasadem," ta sangdong ajanga ashir.

"Küm noklang aika Holy Places of the Redemption nung asenok aliba aser yangji anogoshi arogo rangben aser meimchir ajungtsü atema sarasademba lir," ta ashir.

Holy Sepulcher Church ya Jerusalem indang Old City nung lir, koba Roman Emperor Constantine-i yanglu aser 335 AD nung semzükka liasü.

Iba tekülem ki ya aiben raksa aser yanglushia liasü. Tang aliba tekülem ki ya 1810 nung yanglua liasü.

Iba tekülem ki ya alima nung temeshitaba tesemtem rongnung ka lir, kong küm shia Khristanpur million aikati semdang.

ANO GO ABEN TSÜNGREM DEN

Yakob Tsüngrem

T.ken 146:1-6

"Shiba pei teyari asoshi Yakob Tsüngrem lir, shiba teimla Kibuba pa Tsüngrem dak lir, tepelatsü" (t.5). Iba yagi tanü aser asüing asen nungdak ajakji Tsüngrem lir ta ashir. Kodang nai Tsüngrem metetter, na tepela kar, teimla aser teyari kar: Pa den jajaba nung tepela, tanü tebilemstü khuret abener asoshi teyari aser tarutsü asoshi bilemba nung teimla. Talila nai kechi aginer ?

Yakob Tsüngremji shiba? Mezüingbuba, Paji teyanglur. Tekong 6 ashir, Pa, "shibai anüing aser ali yanglu, tzüyim aser item nung aliba ajak; shibai atangji teti ayur" Iba lima yanglua taküm lidaktsütsüsa uluba nung teperi shisatsü teperi aser tashi teperi pa lir. Pai tanü asen tebilemstü ajak nung yarir.

Tanabuba, " Pa obendanger, shibai tajemreper nem ochi agütsür" (t.7). Kodang nai tai makaba nung aitsür, Tsüngremi metet. Obendangbaji pa nem yujang. Tsüngremi dang raratsü akokba nung ne mapang teindok. Pa nübur ajak den Pa dena lir, aser Pai kechi shidak aji inyaktsü.

Tasembuba, Paji Tebu lir. Tekong 7 nung tebu ayabatem mesüba noksa agütsür. Tsüngrem o-l teti asenok dang Pa temoatsü tejangja sayur. "Aser kü Tsüngremi Kibuba Yisu Khrista nung Pa sentsüwangshi nung Pa rongsen yari nenok tenüingdaktsü ajak agütsütsü" (Fil.4:19).

Pezü, Pa tekümezük. "Kibubai puoka alirtem nem nüji agütsür. Kibubai tenük tapoktem lapoktsür.... Kibubai temeshipur meimer" (t.7,8).

Tatamsa, pa chuba. "Kibubai teti chubatsü" (t.10). Ken ken nai bilemstü, "Ni iba ama chuba ka akatsü metemstü. "aji shitak, saka Pa Yakob Tsüngrem lir. Yakobi metsüdak, aser aibelen, saka Tsüngremi Pa Tsüngrem ama ali. Tatem maka Tsüngremji asen jenokdak lir.

Tsüngremji ne jenokdak tulutiba lir. Saka odangbo na mejenokdaktsür; Pai na asoshi tashi agütsür aser na tashi itdaktsür. Yakob Tsüngremji ne Tsüngrem asü? Yamaji süra, Pa dang jaang aser Pai na yaritsü.



AO BAPTIST AROGO MUNG DANG (ABAM)

IMPUR-798615, MOKOKCHUNG, NAGALAND: INDIA

E-mail: abamimpur7@yahoo.co.in

Website: www.abamimpur.org

METETDAKTSÜR

Aor kaket ken-o-zülu balala; Arogo aser Lokti anaprongla asoshi zülubatam nungi küm shia tajungtiba shimteta 'ABAM Book of The Year Award' agütsür.

Kaket ken-o zülurtemi 2026 küm asoshi teküboklen agüja alibatam nungi leniba agia meranga züluba nung shilem agitsü ajungshir.

I. Kaket shimyim yamai alitsü :

1. Kaket tezülur shisatsü nungi atokba (Original) asütsüla.
2. Kaket zülu nung asalentong tasen (Creativity) aketba.
3. Kaket züluyim shitak (Methodology) amshitetba.
4. Tapu aser pongtem züluba nungi tarensen (consistency) shitak amshitetba.
5. Tazüingertem tajangzük katetsüsa (Utility) züluba.
6. Tapak 100 tema züluba kaket asütsüla.

II. Kaket züluba Oshi : Ao aser English nung züluba nungi ka-ka shimtsü.

III. **Tezülur shimba nung adenba** : Iba Award shimba nung shibaisa adentsü mulungdir, pei züluba kaketji copy asem (5) kaket adokli tekaraba nung Rongjui (Sept) 30, 2026 tashi Mungdang nem agütsütsü. Iba kaket ABAM meyong asütsü. Panel of Judge-kechi kaket shimdir, Senpetji ABAM Küm Tatem Mungdang, Yimpoksüi (Nov.) 12-13, 2026 nung agütsütsü.


(Rev. Tamsü Jamir)
Executive Secretary, ABAM


(Rev. Dr. Moanungang)
Secretary
Education & Literature, ABAM

AO OSHI ANGAZÜKDAK:

TANÜ ANGAZÜKTSÜBA OJANG



Walunir

(n) lokti lenir (leader)

* Walunir tajung alidak lokti tesünap nung alir.

Wama

(v) ana küma rangdang (cut or sawn into two)

* Süng talang asüba agi pai ana küma wama.

OLONG PAITEP # 7454

	1			2	3			
4			5					6
					7			
	8							
	9		10			11		
					12			13
14								
					15			

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. ____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 7453 TELANGZÜBA


TIPIEN :

- 2. Pongsen, 5. Lepko, 7. Omen,
- 8. Maangka, 10. Yangkhu,
- 12. Senpong, 14. Angu, 15. Raksa,
- 16. Arameso,

LANGTSÜNGLEN :

- 1. Alimang, 2. Pongen, 3. Samaru,
- 4. Nün, 6. Pio, 9. Nüngdak,
- 10. Yongya, 11. Kongro, 13. Ora,
- 14. Ata.

NAI-A YA METETTER



Alima nung season ka asoshi oshi teimtiba nung meyipzükbaji television series ji streaming drama 'The Chosen' lir.

'The Chosen' ya oshi 125 nung meyipzüka lir aser iba ajanga "most translated season of a television series" otsü tasen yangluogo ta Guinness World Record-i metetdaksü.

The Chosen ya American Christian historical drama television series ka lir. Iba series ya filmmaker Dallas Jenkins-i yanglur aser Nazareth nung Yisu indang taküm aser ministry otsü lir.

Iba series nung Jonathan Roumie-i Yisu shilem agir aser pa den Shahar Isaac, Elizabeth Tabish, Paras Patel, Noah James, aser George H. Xanthis nungeri tongti shilem agir.

Karbi Anglong ST menden punguprong nung candidate tajung tesa lir



Diphu, March 24, 2026

(Agencies): 2026 Assam Assembly elections atema March 23 nü nomination maparen tembangogo aser iba ajanga Karbi Anglong nung Scheduled Tribe (ST)-reserved constituencies nung tetokteper tajung aika lir.

Karbi Anglong nung political party tongtitem nungi candidate temi tenüng agütsüogo aser talisa

tan election ya Bharatiya Janata Party aser Congress-APHLC alliance tsüngda asütsü.

108-Bokajan LAC nung BJP candidate Surjya Rongphar aser Congress-APHLC candidate Raton Engti na dang tokteptsü.

109 - H o w r a g h a t constituency nunga BJP candidate Lunsing Teron aser Congress alliance candidate Sanjeeb Teron na tokteper.

110-Diphu LAC nung BJP candidate Niso Terangpi aser All Party Hills Leaders Conference president J.I. Kathar na tongti süa tokteptsü. Kathar-i opposition alliance tenüng nung tokteper.

West Karbi Anglong kübok 111-Rongkhang constituency nung BJP candidate & Karbi Anglong Autonomous Council (KAAC) Chief Executive Member Tuliram Ronghang-i Congress candidate Augustine Enghee den tokteper.

112-Amri LAC nung BJP candidate Dr. Habe Teron-i APHLC candidate Bikram Hanse den tokteptsü.

March 24, 2026 nü nominations reprangtsü aser March 26 tashi nung candidate temi tenüng meyipa agütsü. Iba sülen April 9 nü polling asütsü aser May 4 nü votes azüngtsü.

UNESCO World Heritage nung Living Root Bridges dendaktsünür

Shillong, March 24, 2026

(Agencies): 2026-27 cycle atema UNESCO World Heritage List nung züngsemsü atema India-i Meghalaya nung Living Root Bridges tenüng agütsüogo.

Living Root Bridges dang Jingkieng Jri/Lyu Charai Cultural Landscape ta ajar aser UNESCO World Heritage List nung züngsemsü atema tenüng agütsü ta Centre sorkari metetdaksü.

"UNESCO World Heritage Centre nem iba proposal agütsüogo. Living Root Bridges

ya lisopurtemi khenyongi balaka yangluba lir" ta Union Culture Minister Gajendra Singh Shekhawat-i ashi.

Lisopurtemi iba dang "Jingkieng Jri" ta ajar aser Meghalaya nung Khasi nungeri rubber fig trees tera ajanga apu ama yanglua lir.

Item tera aputem ajanga meta talang pilar aliba yimtsüng 75 tema sendakteper aser item apu ta putu aika anepalua arur.

2025-26 cycle atemasa India sorkari Uttar Pradesh kübok Sarnath nung Ancient Buddhist Site tenüng agütsüogo.

India nung tang UNESCO World Heritage Sites 44 lir aser item ya cultural, natural, aser mixed categories nung densema lir.

Archaeological Survey of India (ASI)-i linük nung nüngshilung 3,600 tema anepalur aser iba nung World Heritage properties 27 densema lir.

UNESCO-i agizükra Meghalaya nung Living Root Bridges ajanga alimai indigenous engineering aser sustainable practices meteta akümtsü.

Manipur nung North East India Film Festival (NEIFF) 2026 mungogo



Imphal, March 24, 2026

(Agencies): Manipur nung 3 buba North East India Film Festival (NEIFF) 2026 amungdang Collage nem Best Feature Film agütsüogo.

Collage film ya Sumitra Hazarika-i produce asü aser director ji Amar Deep Gogoi (Assam) lir.

Maneni, Toy Gun nem Best Non-Feature Film award agütsü. Iba film producer ya Khumanlambam Omeshwori lir aser Thingnam Parshuram (Manipur)-i direct asü.

Northeastern state asem-Assam, Manipur, aser Meghalaya nungi film 9 tashi iba benjung nung sayuogo.

3 buba North East India Film Festival (NEIFF) 2026

ya March 21, 2026 nungi TanthaPolis Cinema, Imphal nung tenzük aser Deobarnü tembang.

Iba benjung nung feature aser non-feature films sayu aser itemji Collage, Kangbo Aloti, Ha Lyngkha Bneng, Noi Kotha, Romantic Affairs, Toy Gun, The Check Post, Phouoibee, aser Laininghal Naoria Phullo liasü.

Iba benjungmung ya THOUNA, Directorate of Information & Public Relations (DIPR), Government of Manipur aser All Manipur Film Producers Association külemi ayongzük.

Benjungmung nung Ministry of Information & Broadcasting, Government of India, aser

National Film Development Corporation (NFDC) ajanga teyari agütsü.

- Awards:**
- Best Director award: Monjul Baruah, Romantic Affairs (Assam);*
 - Best Cinematographer: Pradip Daimary, Ha Lyngkha Bneng (Meghalaya);*
 - Best Editor: Sanjib Gogoi, Noi Kotha (Assam);*
 - Best Sound Designer: Debajit Gayan, Kangbo Aloti (Assam);*
 - Best Screenwriter: Doren Naorem, The Check Post (Manipur);*
 - Jury Special Award: Phouoibee*
 - Special Mention: Laininghal Naoria Phullo.*

Colombia nung military tayimtsü ka tsükok; nisung 66 asü



Bogota, Metsüremi/March 24 (Agencies): Colombia nung military tayimtsü ka Hombarnü apusoa aoba mapang tsükokba sülen nisung 66 asü aser nisung pezü samar bushidar, ta ketdangsürtemi metetdaksü. Lendong nung yirurtem mozüki balalai anriogo.

Lockheed Martin-built (LMT.N), Hercules C-130 transport tayimtsü nung nisung 128 mener liasü, kong Air Force züngsem 11, army personnel 115 aser national police office ana densema liasü, ta linük armed forces tekolakba Hugo Alejandro Lopez-i ashi.

Peru den arrtsü nung Puerto Leguizamo nungi apusoa aoba mapang tayimtsü ya tsükoka liasü, ta Defense Minister Pedro Sanchez-i X ajanga metetdaksü.

tayimtsü ya runway tatemlen yimketa atuba mapang timtem ka ajangshi asütsü ta bilemer, ta firefighter

Eduardo San Juan Callejas-i Caracol dang ashi. Tayimtsü ya jizüka aluba mapang tashikang süngtong ka nung tsüka liasü.

Tayimtsü tsükokba sülen mi adok aser tayimtsü nung bena aliba bomb mesükba device kar poka liasü, ta paisa shisem.

Iba tesem nungi alirtemi taküm alirtem tayimtsü nungi atsütet, aser video balala ajanga nisungtemi yirur aliba sepaitem parnok indang motorcycle tem nung anir aoba sayuogo.

Iba sülen military garitem tayimtsü tsükokba tesem tonga ao, ajisüaka ketdangsürtemi ashiba agi, tayimtsü tsükokba tesem ya tonga aotsü temela masü liasü.

Lopez-i ashiba agi, lendong nungi jenbor parnok 57 mozükidang temang anepaludar aser tera dang yirur alir parnok 30 military clinic ka nung temang anepaludar.

Kasa mapang nung tir

Gustavo Petro-i, military modernize asütsü atema pa sentongtem nokdangba atema ketdangsürtem aitsüogo.

May 31 nü taruba Colombia tir election nung tokteptsüpurtem aikati asürtem den asükhu lemsatepogo aser tayimtsü tsükokba bushisingdangtsü ayongzüko.

Lockheed Martin nungi otongdar kati ashiba agi, iba tatalokba bushisingdangba mapang Colombia nem teyari agütsütsü atema par company bendanga agütsür lir.

Hercules C-130 tayimtsütem ya Colombia nung mezüngbuba 1950s nung saya aser mezüngbuba model 1960s tatemlen alizük. Parnoki tawa C-130s tejentem kar model tasen agi melenogo, koba US nungi yoka liasü.

Hercules C-130 tayimtsü ya Colombia nung military operation mapang sepaitem anir senzütsü atema amshia arudar.

US aser Iran külemi Strait of Hormuz azüoktsü Trump-i jembishi

Florida, Metsüremi/March 24 (Agencies): Iran indang energy infrastructure amakba anendaksür ghonda ishika lir US Tir Donald Trump-i Strait of Hormuz ya US aser Iran külemi azüoktsü akok, ta Hombarnü ashi.

Shibai Strait ya azüoktsü ta asüngdangba langzüdang, "Ni asütsü. Ni aser ayatollah, ayatollah ji shiba südir süang," ta Trump-i langzü.

Linük ana tsüngta tangatettep kati aruba den külemi totzü jenjang ya long ama tsüktsü, ta paisa ashi.

Tang tesüsa jembishinüba nung United States aser Iran tsüngta "major points of agreement" tongtetogo, aser ibaji ajanga tang anogo pong memaki ataba junga otetra, Middle East nung tang rara adoka aliba atema pangzüng ka yanglutsü akok, ta pai ashi.

Florida nung Air Force One nung tua mamendang osangbener den jembiba mapang, Iran nung "kanga akumtsüboa aliba" ketdangsür den jembishinü akaba ya Iran-i

nuclear mangdang aser enriched uranium stockpile yutsütsü asoshi rangloker jembishi, ta Trump-i ashi.

"Onoki lenirtem phase ka, phase ana aser phase asem tuluba samatsüogo. Saka onoki nisung ka den jembishinü akar, shiba ataku akumtsüboba aser lenir ta ni amanger," ta Trump-i osangbener dang ashi.

"Onoki enrichment mesüdaksüner, saka onoki enriched uranium aginer," ta pai

ashi.

Jembishinüba nung Middle East envoy Steve Witkoff aser par jala kinungbo Jared Kushner shilem agi, ta Trump-i ashi.

Jembishinütsü atema Iran nungi mezüng aru aser Washington-i mezüng masüngdang, ta Trump-i ashi. Ajisüaka Iran nungi kecha langzüa mali aser semi-official Mehr News Agency-ibo Tehran aser Washington tsüngta jembishinü kecha mali ta ashir.



London nung aliba Hatzola Northwest nung Jewish charity ambulance services meyong gari pezü rongdoktsür aliba noksa ka yangi angur. Iba mapa ya nisung aseme inyak ta police temi amanger aser ibai kiralongra mapa masü saka Jewish nung anema mapa tamajung inyakba ama züngshir.

MULUNGEN O



December 15, 1948 - March 20, 2026

Onoki teti meima aliba asür **Nungsangtola Longkumer** wife of T. Marchiba Jamir (Changtongya) shirangdang aser iba alima toktsür aodang, ana aser talang nungi medemer, kiyonger, doctors, nurses, yimer-yimsanger, Arogo aser lokti palala temi, nübu, rongsen aser Sarasadem agi nungita yariba atema kanga pelar. Nenok kija shia dang ozü-i pelar ta meshitetba atema sasar. Saka asen temeim Tsüngremi nenok ajak moajangma.

- Temeim kinungbu, chirnurtem aser semchirtem.

Russia-i drone aser missile amshia Ukraine maneni amaker

Kyiv, Metsüremi/March 24 (Agencies): Russia-i Mongolbar anepdang drone aser missile amshia Ukraine amakba sülen nisung pongu tepsetba den kitem raksatsüogo aser Moldova aser Europe na tsüngda power link ka densema energy supply tem dak kongshio, ta ketdangsürtemi ashi

Tir Volodymyr Zelenskiy-i, missile aser drone amshia amakba sülen tesem 11 nung teraksatsüba tulu adokba osang angazükogo, ta ashiba den parnok nem teyari agütsüba linüktem dang Kyiv nem manen air defence injangtem agütsütsü mepeshia liasü.

Paisa, US aser Israel na Iran den rara dak rangloker aliba mapang missile tem supply asüba nung tetsükdaksü adoktsü ta shia arudar, kechiyong United States ya parnok nem ballistic missile tem nokdangtsü atema air defence system agütsür tongtibang lir.

"Ukraine nem maneni teyari agütsütsüji kanga tongtibang lir. Air defence atema nangzüktepa aliba ya mapang shitak nung benoka inyaksü kanga tongtibang lir," ta pai X nung post ka ajanga ashi. Rara tenzüker küm pezü dak tema aoba mapang Russia-i Ukraine maneni makar arudar.

Ukraine air force-i ashiba agi, Russia-i infrastructure tongtibagtem nung missile 34 aser drone 392 khaloktsü aser

item rongnungi missile 25 aser drone 365 nokdangogo.

Energy ministry-i ashiba agi, tesem trok nung nüburtem power maka kümogo.

Drone aser missile amshia Zaporizhzhia yimti amakba mapang nisung ka tepsetogo, ta regional governor-i Telegram ajanga metetdaksü. Paisa, 20 ben atongtepa tua yanglur aliba apartment blocs ka densema ki aika raksaba lemsatepogo aser mibenertemi kitem nung mi temseptsü merangba noksa lemsatepa liasü.

Kasa mapang nung Poltava yimti anasa nisung ana tepset aser arishi küm 5 tain tanur ka densema nisung 12 yirua liasü, ta regional governor-i ashiba den, nisung aliba ki ka aser hotel ka raksaogo.

Maneni Kharkiv northeast len electric train ka amakba sülen arishi küm 61 tain passenger ka asü aser ano Kherson yimti nunga nisung ka tepsetogo, ta regional governor-i ashi. Europe den sendaktepba Moldova indang tongtibangtiba power link raksaogo, ta Moldovan tir Maia Sandu-i ashi.

"Jenang tapet agiogo, saka tensa mejungi lir. Iba ya Russia kija khuret lir," ta lai ashi.

Moldova Foreign Minister Mihai Popsoi-i ashiba agi, Isaccea-Vulcanesti power line koba ajanga Moldova aser Romania nung energy system tem sendakteptsür iba dak kongshio.

7buba Mokokchung Inter-ward Football Tournament tenzükogo



Tetushi tejaoker MMC Dy. Chairperson, Lanuakum-i 7 buba Mokokchung Inter-ward football tournament lapoktsüdang tangokba noksa nung angur. Mokokchung, 24th March, 2026.

(Photo courtesy: www.nokinketer.in)

Mokokchung, Metsüremi/ March 24 (TYO): Mokokchung Municipal Council Deputy Chairperson, Lanuakum-i 24th March nü Senayangba Government Hr. Sec. School, Ungma ground nung 7buba Mokokchung Inter-Ward Football Tournament 2026 meraketa tenzüktsüogo. Iba asayamung ya Mokokchung District Football Association (M DFA) aküm nung Marepkong Youth Association-i "rise as one" omen dak rangloker ayongzüka akar.

Taküm iba asayamung nung Mokokchung town kübok ward 14-i shilem agitsü. Pool 'A' nung - yaküm champion Dilong, Tongdentsuyong, Alempang & Penli ward-tem lir. Pool 'B' nung - Sungkomen, Sangtemla & Kumlong ward asem lir. Pool 'C' nung - Marepkong, Mongsenbai, Yimyu aser Lijaba Lijen ward-tem ata-a lir aser Pool 'D' nung - Arkong, Majakong aser Artang ward-tem lir.

Asayamung tenzük match yaküm champion Dilong o Tongdentsuyong na asayaba Tongdentsuyong ward-i goal 4-1 agi akok, tanabuba match Alempang o Penli na asayaba, Penli ward-i goal 3-1 agi akok aser tasembuba match

Sungkomen o Sangtemla na asayaba, Sangtemla ward-i goal 4-2 agi koka liasü.

Iba asayamung ya 4th April, 2026 nü tembangtsü. Asayamung senpet yamai alitsü - tematiba jenjang nem Rs. 50,000/- aser atongdakba nem Rs. 30,000/-. Iba den jurila senpet itemi alitsü - top scorer, best goalkeeper, best defender, best midfielder aser player of the tournament.

Tetushi tesemdanger Lanuakum-i mapang tatsüka agia jembidang, Mokokchung town nung football asaya tsütsü lanurtem ajungshia anitentsü nükla yur Marepkong Youth Association-i iba ama asayamung kümshi ayongba asoshi pelaba den iba asayamung ayongba ajanga Dr. T. Ao mesükba nübu karbo adoktsü teimla akar, ta metetdaksü.

Saisabong nung ya tazüokbaji kanga tongtibang, saka aiben asenoki libaliru junga maliba den mapang shitak mamshir aser mepishia arudaktsünüba jakla asenok dak keta lir, iba ama yimya ali tashi asenoki tangar memeneptsü. Anungji, tama asütsü raktepa shilem agitsü merangang, ta pai asayartem ajungshi.

Sentong nung Ungma yim

nungi yimsüsür Imtibusang Imsong tatar; Kumlong ward chairman, N. Imtitoshi; Mokokchung District Football Association (M DFA) tir, N. Akok Lkr par aseme tayongzüka o tulu bener arua ayongzüka. MIWFT convenor, Bendangsunep-i tarur pelaa agizükba aser Marepkong Youth Association President, Takalong Pongen-i asayamung tenangzüka mapa inyaka liasü.

25th March, 2026 asaya yamai alitsü - mezüng asaya anepdang 11 ako nungi tenzük Marepkong o Mongsenbai ward na saitsü, tanabuba anüngdang 12:30 nungi Yimyu o Lijaba Lijen na saitsü, aser tasembubaji nikong 2:00 nungi Arkong o Majakong na asayatsü lemezükja lir.

Asayatemji angati dang reprangtetsü aser jangratemtsü kaji asayadak tesem (Senayangba GHSS, Ungma) tashi lenmang tajung, anungji, football meimertem ajak arua reprangtsü ayongzüker, ta tayongertemi mepishia metetdaksü. Mezüngbo iba asayamung ya Imkongmeren Sports Complex, Mokokchung nung asayatsü ayonger liasü, saka Koridang by-election agitsü aliba ajanga asaya tesem melenshitsüsa kümatok.

Chiesa yiruba ajanga Italy aquad nungi züngtokogo

Metsüremi/March 24, 2026 (Agencies): 2026 World Cup qualifying play-offs atema Italy squad nungi Federico Chiesa züngtokogo. Italian Football Federation-i ashiba agi winger ya asayatsü asoshi temsüa mali.

Italian Football Federation-i ashiba agi, Chiesa ya taruba asayatem atema temsüa mali. Parnok Brehostibarnü Northern Ireland den semi-final aser iba sülen Wales mesüra Bosnia and Herzegovina den final asayatsü.

Pa kechi yiru iba indang osang tejanga magütsü, saka tang team nungi züngtokba ajanga arishi küm 28 tain asayar indang career nung ano tetsükdaksü ka adokogo, shiba

mapangshia yiruba ajanga timtema arudar.

Pa melena Italy-i Nicolò Cambiaghi shimogo.

Bologna winger, shiba senior team nungi khen dang asayar lir, pai tang asaya aliba season kanga junga asayadar aser tang tashi nung goal asem idaktsüba den assist pezü süja lir.

Chiesa ya mapang talang ka lir tangang national team nung züngoksema liasü. Pa linük team nungi tatemsä Euro 2024 nung asaya liasü.

Pa 2024 küm Juventus nungi Liverpool-i aoba sülen junga masayateti arudar aser Premier League nunga asaya kar nung dang asayar.

Euro 2020 akokba mapang pa ya Italy asoshi kanga dang tongtibang asayar ka liasü, saka pa mapangshia yiruba ajanga international career nung tetsükdaksü adoka arudar.

Maneni Alessandro Bastoni aser Gianluca Scamacca nata tang asadangba mapang lir aser Roma defender Gianluca Mancini-a yiruogo.

Italy team Northern Ireland den Bergamo nung asayatsü aser parnok 2026 FIFA World Cup nung asayatsü atema asaya anaprongla akoktsü nüngdaker. Parnoki asaya mekoktetra parnok World Cup asemubaba atonga masayatsü.

Punjab nung Asian Champions Trophy ayongzüka asayatsü

Metsüremi/March 24, 2026 (Agencies): Asian Champions Trophy tang mezüngbuba Punjab nung ayongzüka asayatsü lir, ta Chief Minister Bhagwant Mann-i metetdaksüogo.

Asayatem ya Mohali aser Jalandhar na nung asayatsü, kong hockey asaya ya kanga junga tera yangloka lir. Ajisüka kodang koma asayatsü aji tang tashi telemetba magi lir. Asayamung ya October 26 mestüra 27 nü tenzüktsü imlar.

Punjab nungi linük atema hockey asayar tajung aija anitetogo aser iba state ya India nung hockey asaya atema kanga dang tongtibang ta züngshia arur, saka iba state nung tang tashi iba amai international asayamung ka danga ayongzüka asaya mali.

Kasa mapang nung Mannisa, state nung annual Four-Na-

tion Hockey Championship ayongzüka asayatsü lir, koba international spotlight ya küm nungi küm ka ta Punjab dak maneni rangloker toktsütsü nükjidong nung ayongzüko.

"Onoki asayamung nungja agütsütsü asoshi inyaktsü aser infrastructure atema sentong ka yakta benoktsü," ta Mann-i ashiba den asayamung ka ayongzüka asayatsü atema dang masü saka sustainable sporting ecosystem ka yangertsü sorkar sentong lir, ta shisem.

Maneni küm 44 sülen Jalandhar nung tang mezüngbuba National U-13 Badminton Championship ayongzüka asayatsü lir.

Ano nüngtugu 'Khed Wattan Punjab Diyan'-a September ita ayongzüka asayatsü, kong arishi küm 16 nungi 75 tsüngda aliba asayatem asaya balala atema longjemdaksütsü.

Miami Open: Gauff-i alizüng tasen ka tongtetogo



Coco Gauff

Metsüremi/March 24, 2026 (Agencies): Miami Open tetsür kija asaya nung Coco Gauff-i set asem kanga meranga asayaba sülen Sorana Cirstea koka quarterfinal tongogo. Iba asaya akokba sülen lai alizüng tasen ka tongtetogo.

6-4, 3-6, 6-2 agi asaya akokba sülen Gauff-i WTA 1000 asayamung 10 prongla nung quarterfinals tonga asayateta alizüng tasen ka tongtetogo.

Arishi küm 20 tain asayar ya arishi küm 23 majung tsüngda WTA 1000 (aser taoba mapang Tier I) quarterfinal timbaben atongba asayatem rongnung tanabula kümogo. Lai Maria Sharapova aser Svetlana Kuznetsova nung amala nüngtugu asayatem ajatetogo.

Iba asayamung nung mezüngbuba asaya ana nung Elisabetta Cocciaretto aser Alycia Parks na den asayaba mapang set kaka mekoki aliba nungi meyipa tur asaya akokba sülen Gauff maneni kanga meranga asayarang asaya akoktsüsa tia jenjang kati ai. Cirstea den asayaba

mapang mezüngbuba set ayong ayonga akokba den tanabuba set nunga la 3-1 agi tejakdang liasü.

Ajisüka Romania tsürula yagi game pongu atonga koka tanabuba set akok aser iba ajanga decider asayatsüsa aküm.

Ajisüka tasembuba set ya Gauff-i kanga junga asaya tenzük aser la yakta dang 3-0 agi tejakdang aküm aser lai asaya amokbanger asaya-a asaya 6-2 agi ayong ayonga koka liasü.

La quarter final nung Belinda Bencic den asayatsü, koba la asoshi tetendangba ka asütsü.

Tebur kija asaya nung Italy nung world number two asayar Sinner-i France nung asayar Corentin Moutet 6-1 6-4 agi kokogo.

Kasa mapang nung taoba mapang world number one asayar Daniil Medvedev shiba Indian Wells nung Carlos Alcaraz tsükdakja liasü, pa round of 32 nung Francisco Cerundolo-i tsükdaksüogo.

Argentina nung asayar yagi iba asaya ya 6-0 4-6 7-5 agi koka liasü.

BILEMDANGANG

"Tamakok ajak nung takok lenmang ngutettsü."